


Evangelii tenor Lucas 19,1-10



Lu eis el vegnius a Jerico ed ei ius tras il marcau.

Ed uarda, cheu fuva in um cun num Zacheus. Quel fuva cau dalla duana ed era rehs.

El tscharcava da veser, tgi che Jesus seigi. Muort la fuola fuva quei denton nunpusseivel per el, pertgei el fuva pigns da statura.

El ei currius ordavon e revius sin in figher selvadi per veser Jesus che stueva vegnir leu sperasvi.

Arrivaus en quei liug, ha Jesus alzau I'egliada e detg ad el: Zacheus, fai spert e neu giu, pertgei oz stoi jeu prender albiert en tia casa!

Ed el ei descendius beinspert ed ha retschiert Jesus cun grond plascher. Tut quels che han viu quei murmignavan e schevan: Tier in puccont ha el priu albiert! Mo Zacheus ei passaus avon il Segner ed ha detg:

Mira, Segner, la mesadad da mia rauba dun jeu als paupers, e sche jeu hai cuglienau enzatgi, vi jeu restituir il quaterdubel. E Jesus ha detg ad el:

Oz ha questa casa retschiert spindrament, pertgei era el ei in fegl d'Abraham. Il Fegl dil carstgaun ei gie vegnius per encurir e spindrar quei ch'era piars.